

الفاجومي

خرجت من السجن شاعرا

- شقيقى على الذي خرج ولم يعد كان في الزنزانة
المجاورة لي.
- مقدمة ديواني الأول كتبها «دكتورة سهير
القلماوي».
- مسك الإذاعي طاهر أبوزيد الميكرفون وقال...
أحمد فؤاد نجم.. تذكروا هذا الاسم جيداً.
- سألتني يوسف السباعي: مؤهلاتك إيه؟.. أجبته
كاذباً: توجيهيه.
- في ليله من صيف ١٩٦٢ كان أول لقاء مع الشيخ أمام
في حوش آدم.

obeyikan.com

واحنا عيال .. أمى ماكتش بتفوت مناسبة عامه رمضان والعيدين ونص شعبان
وسبعة وعشرين رجب وعاشورا وشم النسيم.. إلخ.

كانت تفضل تولول وتبكي على الغائب الحاضر على أخويا البكرى وأول الفرحة
اللى ضاع منها فى الغربه وطريق السفر.

ودا كان بيثوقنى لمعرفة أكبر كمييه من المعلومات عنه.

- كان شكل مين يامه؟

تقول لى من بين دموعها:

- ماكانش له شكل ولا زى يابنى.. كان زى القمر وكان شاطر ونبيه ولد
ماجابتوش ولاده.. دى عين وصابته يا قلب أمه.

وترفع إديها للسماء وتقول:

- وحياه حبييك النبى تبل ريقى بشوفته قبل ما أموت عطشانه.



وذاذات ليله من ليالى أرميدان كان حسنى يشله بيحكى لنا بأسلوبه الجميل عن
بعض مغامراته العجيبه فى عالم الليل وجاب سيره شخص اسمه على عزت وسألته
فوراً:

- مين على عزت يا حسنى؟

بص لى بدهشه وقال لى باستنكار:

- فيه حد فيكى يا مصلحه السجون مايعرفش على عزت؟ على عزت دا ملك
الخنز وعمده أى سجن يدخله.. دا عليه قلم ما ينزلش الأرض.. اللى يكتب فيه
شكوى قول يا رحمن يا رحيم عليه.. وأى شاويش فيكى يا مصلحه السجون بيعمل
له ألف حساب.

أنا ماخدتش واديت فى الكلام لكن ربك والحق الموضوع شغلنى فتره طويله
انتهت بموت الفتى حسنى وخلو مطرحه جنبى.. ودا كان فى مطالع الستينات مات
فى عمر الورد - أربعه وعشرين ربيع.



- اسمع اسمك العياده.. اسمع اسمك الجلسه.. اسمع اسمك الزياره.. إلخ.
دى النداءات اللى كنا بنصحى عليها كل يوم فى سجن أرميدان.. وف يوم
سمعنا..

- اسمع اسمك المكتبه على عزت.. اسمع اسمك المكتبه.. فبن على عزت؟
قمت من على نموتى متور وحطيت وذننى على نضاره الباب سمعت نفس النداء..
حسيت بقلبي نزل فى رجليا.. سألت بصوت استنكار عالى:

- هو على عزت هنا؟

- سمعت أكثر من إجابته أوضحهم إجابته خليل الذئب:

- ماهو جنبك فى أوضه اتنين.

قلت له:

- هو قضيته إيه يا ذئب؟

ضحك وقال لى:

- جايبينه م الجامع.. جاى فى ركعتين غلط.



فى طرقه العنبر لقيتني وجهًا لوجه مع الشخص اللى شاور لى عليه خليل
الذئب.. عمرى ما قابلت شخص أنحف منى إلا هو.. جلد على عضم.. عنيه لونهم
فروزى زى عنين أمى الخالق الناطق.. شوية الشعر اللى فاضلين فى دماغه صفر

وناعمين ما فيهمش شعره بيضه.. وشه نفس اللون البمبي.. الشباب والصبا في ملامحه يبحاربوا معركتهم الأخيره ضد الشيخوخه اللي بدأت تزحف على رقبته وقورته.. سألته:

- إنت اسمك إيه بالكامل؟

بدون تردد قال لي:

- علي محمد عزت نجم.

قلت له وأنا شبه مذهول:

- إنت مين؟

قال لي:

- من الشرقيه.

- مين من الشرقيه؟

- من العباسه.

حسيت إن الأرض بتدور بيا قبل ما أوجه له السؤال الأخير:

- أمك اسمها إيه؟

بمنتهى البساطه وبدون تردد قال لي:

- هانم.

ارتميت في حضنه.. احتضنى بشده.. حسيت في حضنه بالأمان والدفا.. تذكرت

حضن أبويا على الشمروخ.. انخرطت في البكا أكثر.. قال لي:

- إنت مين؟

قلت له:

- أنا أخوك.

قال لى بفرع:

- يا نهار أسود.. أخويا مين؟

قلت له:

- أخوك فؤاد.

قال لى:

- أودا؟ وإيه اللي جابك هنا؟

ضحكت من بين دموعى وقلت له:

- اللي جابك.

وحكيت له الحكايه من طقطق لسلامو عليكو.

خدنى ودخلنا أوضه اتنين.. لقيته فارش فى المراه.. يعنى بلغة السجن عمده..

وقف على باب الأوضه ورفع إيدى زى حكم الملاكمه وقال:

- أخويا أهه يا مجرمين يا كفرة يا ولاد الكلب.

ضحكوا كلهم وقاموا سلموا على واحد واحد وقال عم أمين محسن حرامى

البهايم:

- سبحان الله.. انشكل صحيح مش واحد.. لكن الدم واحد.

وضحك شراره زميل على وقال له:

- وأنت عرفت أزاي حكايه الدم؟ إذا كان واحد فيهم عنده دم والتانى

ماعندوش؟

وقال على:

- إوعوا تفكروا إن أخويا حرامى زيكو.

وقال له شراره:

- آمال يعنى جاى سياحه؟

وبمرور الزمن بدأت أكتشف فى على عشقه للمعرفه والقرايه وكمان قریت له
محاولة لكتابه المسرح.. كان كاتب نص عن صلاح الدين الأيوبي.. طبعاً أنا ما
أقدرش أقيمها فنياً.. لكن كميه المعلومات اللى أوردتها فى النص تنم عن إنسان
واسع الاطلاع واللى أدهشنى أكثر موقفه الوطنى الواعى بالنسبه لقضية فلسطين
وإيمانه العجيب بحتميه هزيمه المشروع الصهيونى.

حكى لى بعض مغامراته فى عالم الجريمة.. حكاها بروح طفل شقى فرحان بكل
اللى عمله باعتباره مجرد لعب برىء.

وأنا حكيت له عن الأسره وانهيأرها اللى بدأ بموت مديحه فى البلد بعد وابور
الجاز ما فرقع فيها.. والأقاويل اللى انتشرت فى البلد عن سبب موتها وهل هو قضاء
وقدر ولا انتحار؟ وانفجر على بالبكا وقال:

- يا حبيبتى يا دَحْ دَحْ.. البنت عاشت مظلومه وماتت مظلومه.

ومره سألنى سؤال غريب:

- لكن قول لى يا فؤاد.. أبويا مات راضى عنى.. ولا غضبان على؟

قلت له:

- أبوك مات على خوانه.. لا لحق المسكين يغضب ولا يرضى.

فينك يامه تيجى تبلى ريقك قبل ما تموتى عطاشه؟.. أهه على يامه..

ياترى لو شفثيه فى المكان ده وفى الوضع ده.. حتفضلى بنفس اللهفه.. ونفس

الحسره ونفس المشاعر؟.. ما أعرفش.. كل اللى أعرفه إنى بعد ماشفت على حبيته

أكثر من مجرد أخ!



تلاته كانوا متخزينين فى زنانه صغيره فى دور ٢ ممنوع حد يتصل بيهم وممنوع

هما يتصلوا بحد ومنوع عليهم الجرايد والورق والقلم وأى شىء له علاقه بخارج الزنزانه.. دى تعليمات قائد العنبر الرائد يونس مرعى.. اللى بينفذها بصرامه الشاويش - عبدالغفار الريح.

أنا فى هذه الأثناء كانت رجلى اليمين مكسوره وفى الجبس نتيجة ارتطامها بجسم صلب اللى هو راس المسجون إبراهيم الخضرى واحنا بنلعب كوره فى الأوضه انتهزت فرصه يوم راحه عبدالغفار ونزلت لهم العصر بعد الإداره ما روحت ونزلت لهم.. سمعتهم وسمعونى وسألتهم وسألونى وعرفت إنهم شيوعيين مقبوض عليهم ضمن أعداد كبيره متواجدين فى معتقلات الواحات والقيوم وبنى سويف والقلعه وأبو زعل علاوه على مجموعته فى عنبرج فى أرميدان ومن خلال استمرار وتطور علاقتى بيهم عرفت منهم إن الشاويش عبدالغفار الريح متعاطف معاهم جداً!

الثلاثه كانوا عبد الحكيم قاسم الروائى الموهوب صاحب روايه أيام الإنسان السبعه وسامى خشبه الناقد الأديب المعروف وابن المرحوم درينى خشبه الناقد المسرحى الكبير وحسين شعلان الكاتب السياسى المعروف.

حكى لى عبدالحكيم قاسم عن المشاكل اللى ترتبت على اعتقاله بالنسبه لأسرته خصوصاً وإن أبوه كان شيخ مسن.. والحقيقه إن الطريقه اللى حكى لى بيها استفزتنى فسألته:

- وإنزى تسيب لأهلك اللى ربوك وعلومك كل المشاكل دى؟

ضحك وقال لى:

- هو أنا اللى اعتقلت نفسى؟

قلت له:

- قلبك ما بياكلكش على أبوك وأمك وأختك؟

قال لى:

- أنا قلبى بياكلنى على مصر كلها... ويوم ما تتحل مشاكل مصر.. حتتحل معاها مشكله أبويا وأمى وأختى.

ليلتها أنا ما نمتش.. إيه الكلام العجيب ده! وإيه الناس دول؟

بعد كده كنت بازورهم كل يوم وأسمع كلامهم ومناقشاتهم وأهم من كده كانوا بيسمعونى قصايد شاعرهم العظيم فؤاد حداد ولو إن الكم اللي كانوا حافظينه من أشعاره كان قليل جداً إلا إنه دخل قلبى وأيامها كنت باكتب قصايد ديوانى الأول - صور من الحياه والسجن - فاعتقدت إنى: بأساهم فى نشر أشعار فؤاد حداد المنوعه فأخذت مقاطع منها على قد ما أسعفتنى الذاكره وأضفتها لأشعارى.. ماكتتش أعرف إنى أنا شخصياً ح ابقى الشاعر المنوع فى كل الأقطار والأزمان العربيه وده كان اللقاء الثانى بينى وبين الشيوعيين المصريين.



فى السنه الأخيره فى سجن أرميدان اكتشف الشاعر أحمد فؤاد نجم.

ومن حسن حظى أن يكون اللواء إبراهيم عزت فى هذه الفتره هو مدير سجن أرميدان والرائد سمير قلاده هو المأمور.. لتنين دول هما اللى احتضنوني وشجعوني وكانوا بيععملولى ندوات شعريه فى مسرح السجن وينشرولى شعرى فى مجلة السجن اللى فزت بجايزتها فى مسابقه عيد الأم بقصيده بحر الحنان وكانت الجايزه جنيه.. وحرصنى الرائد سمير قلاده على دخول مسابقه الكتاب الأول وجاب لى الورق على حسابه ونسخ لى القصايد على المكته وبعثها بمعرفته إلى مجلس الفنون والآداب والعلوم الاجتماعيه.

وكان الرائد سمير قلاده شديد الشبه بالرئيس جمال عبد الناصر ولذلك لما كتبت له الإهداء فى مقدمه ديوان المسابقه - صور من الحياه والسجن - كتبت كده:

فنان وتعطف ع الفنان

ولك أيادي ومآثر

ولك حكاية في كل مكان

يا صوره من عبد الناصر

وكانت نهاية فترة العقوبة.. ثلاث سنوات سجن مع الشغل والنفاذ - توافق يوم الجمعة ١١ مايو ١٩٦٢ بتلات أرباع المده لحسن سيرى وسلوكى فى السجن ليلتها ما جليش نوم.. أخرج من السجن.. أروح فين؟.. وأعمل إيه.. أنا خلاص بقيت شرك.. ويا رتنى أعرف أسرق وأرجع السجن تانى يا ترى لو رحت لمحمد أخويا مراته حتفتح لى الباب؟.. وحتى لو فتحت حتقابلنى إزاي؟.. وحتى لو قابلتنى كويس.. غايته ح اتغدى وبالسلامه.. أروح فين بعد كده؟.. دى كانت أطول ليله فى حياتى.

الساعه سبعة الصبح فوجئنا بالفتاح فى باب العنبر وتصورنا تفتيش وسمعنا:

- إنتبأاااااه «كبير قوى».

وبدأ كل مسجون يخبى المنوعات اللى عنده.. وكانت المفاجاه الأكبر إن المفتاح بقى فى أوضتنا وبعدين:

- إنتباه.

وقفنا بسرعه وإذ باللواء إبراهيم عزت نفسه ووراه الرائد سمير قلاده وانجھوا ناحيتى وقال لى اللواء إبراهيم عزت:

- مبروك.

قلت له:

- الله يبارك فيك يافندم.

قال لى:

- إنت عرفت؟

قلت له:

- أيوه.. ما أنا إفراجى النهارده.

قال لى:

- أنا مابتكلمش على الإفراج.. إنت قرئت الأهرام النهارده؟

وقدم لى ملحق أهرام الجمعة ولقيته معلم على خبر فى الصفحه الأدبيه:

«قررت لجنه الشعر بمجلس الفنون نشر ديوان (صور من الحياه والسجن) للشاعر

أحمد فؤاد نجم.. بعد فوزه فى مسابقة مشروع الكتاب الأول».

بعد كده أنا ما شفتش حاجه لكن سمعت صوت سمير قلاده بيقول لى:

- إنت دلوقتى حطيت رجلك على بر الأمان.



يوم ما استلمت عشر نسخ من ديوانى الأول «صور من الحياه والسجن» طلعت

من مجلس الفنون زى المجنون.. ركبت الترولى باص قعدت جنب واحد أفندى

لسه فاكر شكله.. مصرى مصرى مصرى.. قدمت له النسخه وقلت له:

- ده ديوانى الأول.. شوف.

الراجل طلع ظريف.. ممكن اشترى نسخه؟

قلت له:

- النسخه دى هديه منى.. ممكن تقبلها؟

قال لى:

- يسعدنى إنى أكون أول قارىء ليك وتأكد إنى ح افضل أدور على اسمك وكل

ما تصدر كتاب جديد ح احتفل معاك بيه.

ونزلت م الترولى وكان أول إنسان أفكر فيه هو عفاف بنت خالى حسين.. ليه

أثناء ماكنت زايد عن الحاجه فى السكه الحديد فى الزقازيق.. سكنت مع عبد العزيز أخويا فى شارع صبور اللى فيه بيت خالى حسين وعمتى عيشه وكان طبعى يحصل التزاور اللى من خلاله شفت عفاف الجميله واتشعلت بيها بناء على وعد خالى حسين يوم ما ودانى المدرسه - الملجأ - وبعد ستين حب ملهلب اتجوزت مصطفى ابن عمى الموظف بمصلحة السياحه - ماكانتش بقت وزاره.

وعلى باب مصلحة السياحه سألت عن الأستاذ مصطفى نجم وطلعونى مكتبه فقدمت له تانى نسخه من ديوانى «صور من الحياه والسجن».. طبعاً أنا ماكانتش قاصد مصطفى.. إصحى للموضوع.. أنا راسم السيناريو فى دماغى ما يخرش الميه.

حياخد مصطفى الديوان ويروح بيه ع البيت ويرميه على أول كرسى أو تراييزه تقابله.. عفاف حتشوف الديوان وتقرأ الاسم.. حتساهى جوزها وتسحب الديوان ترميه فى أوضه النوم وتطلع تحضر الغدا لمصطفى يقول لها:

- مش ح تاكلى معايا يا حبيبتى؟

تقول له:

- لأ.. أنا ح ادخل أنام.. تعبانه شويه.

وتدخل تنام وتقفل عليها باب الأوضه من جوه وتاخذ الديوان فى حضنها.. وتبكى - بكاء صامت - وتبوس اسم المؤلف - فيتلوث من الروح فتغسله بدموعها وبعد ما تقرأ الديوان أربع مرات تجيب ورقه فاضيه وتكتب إلى «أ.. ف.. ن» اللى هى الحروف الأولى من اسمى.. أنا اللى استاهل كل اللى جرائى.. الغالى بعته رخيص ولا احسبوش غالى.. فقدتلك يا حبيبتى وغبائى.. إلى اللقاء يا شاعرى الجميل.. إلى اللقاء فى جنه الخلد.. وبعد كده يكسروا عليها باب أوضه النوم يلاقوها قاطعه شريانها ومبتسمه وهى ميتة.. والورقه والكتاب جنبها.

عرفت من الأستاذ حسن السباعى الموظف بمجلس الفنون إن الدكتور سهير

القلمماوى هى اللى كتبت لى مقدمة الديوان وإنها عايزه تشوفنى.. طبعًا ماكتتش تعرف إنى فى عنبر ب بسجن أرميدان.. خدت عنوانها من المجلس ورحت لها البيت فاستقبلتنى بترحاب وشرحت لها الموقف فككتبت لى جواب للأستاذ يوسف السباعى - سكرتير عام مجلس الفنون والآداب.

دخلت مكتب مدير مكتب يوسف السباعى فى مجلس الفنون فحصل لى ذهول من كم وحلاوه النسوان اللى هناك.. سلمت الجواب للبيه مدير المكتب وانسحبت بهدوء وأنا مفهوش وفتاح بقى وعمال أعطس فى كل اللى يقابلنى.. وأعتذر! أنا لغاية دلوقتى مش فاكر إزاي قدرت أخرج من المجلس وأوصل لمبنى الإذاعة فى شارع الشريفيين؟

وفى الإذاعة وعلى مكتب الإذاعى اللامع طاهر أبو زيد تركت كراسه فيها أشعار وورقه فيها اسمى وموضوعى وروحت.

مافيش يومين عديت على مجلس الفنون ففوجئت باليه مدير المكتب قايم منتور من على مكتبه ومحدوف ناحيتى.. فبدأت أستعد للجرى.. مش يمكن وأنا خارج مدهول المره اللى فاتت عملت مصييه؟ وإذا باليه ياخذنى بالحضن وهو بيقول:

- أهلاً.. أهلاً بالشاعر العظيم.. اتفضل سيادتك.

وقعدنى على كرسى جلد من اللى بيلف وسألنى:

- قهوة سعادتك أيه؟

قلت له بمتتهى البساطه:

- ساده.

قال لى:

- كل العباقره بيشربوها ساده.

وبعد ما طلب لى الساده قال لى بعتاب رقيق:

- طب يا أستاذنا العزيز مش اللي يجيب ورقه ليوسف بيه يستنى النتيجة؟

قلت له بتأفف:

- هُف.. مشاغل يا عزيزى.

قال لى:

- ربنا يكون فى العون.. حنقرا حاجه جديده أن شاء الله.

قلت له:

- ربنا يسهل.

وبالليل قابلت يوسف السباعي قى نادى القصره بشارع القصر العينى وبعد محاضره منه عن إن الخير لازم ينتصر فى النهايه وإن الجريمه لا تفيد وأن لا تيأسوا من رحمه الله وإن المجتمع ممكن يصفح عن أبنائه المخطئين سألنى:

- إنت مؤهلاتك إيه؟

حاولت أضرب فى العالى فمفكرتش غير بكالوريوس طب أو هندسه.. لكن

لقيتها حتبقى واسعه فقلت له:

- توجييه.

قال لى:

- طيب أناح اعينك فى منظمه التضامن بمرتب شهرى اتناشر جنيه.. ودول

يجيبوا العيش الحاف.. وإنت بقى بشطارتك تجيب الغموس.

يومين كده ورحت الإذاعه ففوجئت بالأستاذ طاهر أبو زيد بيكرر معايا نفس

اللى عمله البيه مدير المكتب:

- إزاي يا راجل متستناش لما أرجع من التسجيل؟ عموماً أنا آسف لأنى ماكنتش

فى شرف استقبالك.

ولقيتني باقول بدون أى داعى:

- أو.. يا عزيزى طاهر.. أرجوك ما تخرجنيش.

الراجل سهم شويه كده وبعدين قال لى:

- إن شاء الله موعدنا يوم الخميس الساعة اتنين فى مسرح الهوساير عشان أسجل

معاك حلقة من برنامج جرب حظك.

وفى الموعد المضروب رحت لقيت قاعة مسرح الهوساير مكتظه بالجمهور اللى

فوجئ بأن فارس الحلقة مواطن ضايع ولسه خارج بشوكة من سجن أرميدان ومسك

المذيع الناجح المتمرس على النجاح الميكروفون وقال:

- أحمد فؤاد نجم.. تذكروا هذا الاسم جيداً.. هذا الاسم سيلمع ويحلق فى

سماء الشعر عن قريب.. وصاحب هذا الاسم دفعته الظروف إلى طريق الجريمة ثم

إلى غياهب السجن وكان المفروض أنه يتحول إلى خارج على القانون ومعادى

للمجتمع لكن الشاعر جواه انتصر على الجريمة وقسوة الظروف فترجم ألمه ومحتته

إلى قصائد عذبه تقطر بالحزن والأمل فى نفس الوقت.. وفوجئت بالتصفيق الحاد

ينفجر فى كل أرجاء القاعة.. والحقيقة أن الأستاذ طاهر أبو زيد استطاع بذكائه إنه

يلهب أكف الجمهور بالتصفيق الحاد المتواصل على مدى ساعه ونص مدة التسجيل


اللى قدم من خلاله عرض مسرحى شيق سجله ليذاع ضمن حلقات برنامجه

الإذاعى الناجح «جرب حظك». وفى نهاية العرض قال طاهر أبو زيد:

- يا وزاره الثقافه.. هذه موهبه حقيقه مدفونه فى التراب فإما أن تحظى بالرعايه

التي تستحقها وإما أن تتحول إلى طاقه شر وسلاح هدام ضد المجتمع.





بعد ما انفتحت كل الأبواب فى وشى وأصبحت موظف فى هيئه دوليه وشاعر
إذاعى ودا الأهم.. اتجهت بكل ثقته إلى مصلحة السياحه عشان أضرب ضربتى
واستقبلنى مصطفى ابن عمى بكرمه الغريزى وطلب لى القهوه.. فضلت أفتش بعينى
عن الديوان مالقيتلوش أى أثر وفى الوقت نفسه ماسمعتش منه أى خبر عن انتحار
أى شخص أو سؤال أى إنسان عن شخصى الضعيف.. قلت:

- يمكن بيتلائم.

وفوجئت بيه بيقول للساعي:

- اطلع يا عم عبيد شوف سعد الموجي فوق.

وبعدين قال لي:

- فيه جدع مجنون زيك عندنا وقرا الكتاب بتاعك وعجبه وقلب دماغى وعايذ يشوفك ضرورى.

وقبل ما استوعب فرصه الحصول على القارئ رقم اتنين.. دخل سعد الموجي شاب مصرى الملامح والروح.. حيانى وسلم على بحراره وقال لي:

- أنا سعيد جداً برؤياك.. سعيد مرتين.. مره لأنى باقابل شاعر أصيل ومره تانيه لأنى اتأكدت إن بيرم التونسي ما ماتش.



نور ملاً نفسى بالأمان والفرح والحب وادانى إحساس بالثقه فى نفسى وفى العالم وخضر قلبى اللى كان قرب يشف ويموت.. هو دا كان إحساسى بسعد الموجي بدون زياده ولا نقصان.

وبعد جلسه ممتعه فى مكتبه قال لي:

- فيه عندنا راجل فنان أنا رأيى إنه فنان أصيل لكن الناس كلهم بيقولوا عليه دقه قديمه وزمانه ولى وأنا بصراحه عايزك تسمعه وتقول لي رأيك فيه عشان تنورنى وتحسم لي المسأله دى.

على فكره.. التواضع الأصيل فى سعد الموجي المثقف المصرى الرائع ممكن يخدع بعض الناس ويتهيالهم إنه واحد من اتنين.. يا إما جاهل يا إما بيدعى التواضع ودا والعياذ بالله أسوأ أنواع الغرور.. لكن الحقيقه غير كده خالص.

سعد الموجي أولاً ينحدر من سلسال طاهر.. أبوه الشيخ عبد السلام الموجي..

إمام جامع الفكهاني ومعلم الفقراء في حوش قدم وموئلهم وبيته هو التكيه المفتوحه لكل من هب ودب يلاقى فيها المأكّل والمشرب والمأوى وحسن الضيافه.. ورغم قيد الوظيفه كان له موقف سياسي مشرف ضد الإنجليز والقصر وحكومات الأقليات وكان مرشح الوفد بيعتمد بشكل أساسي على تأييد الشيخ عبد السلام الموجي لأن ده هو الضمان الرئيسي لوصوله للبرلمان أما جد سعد الموجي فهو العالم العلامة الشيخ سعيد الموجي أحد علماء الأزهر الشريف المشار إليهم بالبنان ويكفيه شرف وفخر إنه احتضن شاعر الثورة العراقيه ومنشدها وخطبها العظيم عبد الله النديم أثناء فتره هربه من ميت الغرقا مسقط رأس عائله الموجي من هنا خرج سعد الموجي وانطلق في الدراسه حتى حصل على ليسانس آداب قسم إنجليزى من جامعه القاهره وحصل على منحه دراسيه في أيرلندا وعاد منها مديراً لإداره المطبوعات بوزارة السياحه.. أما عن قراءات سعد الموجي الخاصه فحدث ولا حرج ابتداءً من طبقات الشعرائى ومروراً بالحلاج ومحيى الدين بن عربى والنصرى فى التصوف إلى آخر نظريات بريخت وبيتر بروك فى المسرح وأدم سميث وكارل ماركس فى الاقتصاد إلى جانب حفظه للقرآن الكريم وديوان الشعر العربى ابتداءً من امرؤ القيس وانتهاءً بمحمود درويش.. إلخ.

القصد وأعدنى سعد الموجي على اللقاء فى قهوة البرلمان فى ميدان العتبه الساعه ثمانيه مساء الجمعة لننطلق منه إلى حوش قدم لمقابله الفنان المذكور والحقيقه أنا مش فاهم لغايه دلوقتى أنا ليه رحى فى ميعادى.. دى مش عوايدى النصيب بقى.

وصلنا حوش آدم زى الناس ما بينطقوها.. كان المغرب على وشك الحلول والحاره مكنوسه ومرشوشه وروايح البخور والعطاره منتشره وعامله جو من السحر وفى البيت رقم ٢ عطفه حوش قدم طلعتنا الدور الثانى لقينا أنفسنا فى أوضه قاعد فيها شخص مهيب قدامه طرابيزه عليها خواتم وأساور وحلقان وهو ماسك ماسوره فى بقه وبينفخ فيها تطلع نار يلحم بيها الذهب والفضه.. ورمى سعد الموجي التحيه بأدبه المعهود فرد الراجل عليه بالأطه فاحترمه وقدمهولى سعد الموجي قال:

- الأسطى محمد على الشهير بمحمد الصايغ.

قلت له:

- أهلاً وسهلاً تشرفنا.

ماردش على فاحترمه أكثر.

وقدمنى سعد الموجى:

- الأستاذ الشاعر أحمد فؤاد نجم.

ماكلفش خاطره يبص ناحيتى فبدأت أخاف منه.. وسأله سعد الموجى:

- أمال مولانا فين؟

ماردش.. لكن قام بص من الشباك ونده:

- يا إمام إنزل.

أنا قلت أكيد رئيس حوش قدم بما فيها سعد الموجى.

وسمعنا خبط ع الباب وقام المحترم يفتح الباب ودخل الشيخ إمام والنوم لسه

على وشه ولابس فانله مقرحه ولباس بشباك من ورا ودخل الحمام وفجأه قال

المحترم:

- أنا نازل يا إمام.. عايز حاجه م الأرزخانه؟

قلت له:

- منين؟


قال لى:

- م الأرزخانه.

قلت له:

- إلهى لا توصل هناك ولا ترجع هنا تانى يا ابن الكلب يا جزمه قديمه بقى
حابس دمي وملبش جتتى م الصبح وجاى دلوقتى تقولى الأرزخانه.

وانفجر سعد الموجى بالضحك وضحك المهيب وسمعنا ضحك الشيخ إمام م
الحمام.



بويشة الفنان **بويشة**

بعد التعارف والشاي والذي منه طلب سعد الموجي من الشيخ إمام بأدب شديد إنه إذا تكرم يسمعنا حاجه.. وطبعاً أنا كنت اديت الشيخ إمام إيهاء يانى من شعراء الإذاعة.

وكان العود فى نفس الأوضه اللى احنا فيها جابه وناوله للشيخ إمام بعد ما نزل من عليه كمية تراب تؤكد أنه لم يستعمل من سنين واللى أكد ده أكثر إن الشيخ إمام قعد يدوزن الأوتار أكثر من ساعه ونص وبعدين سألتى:

- أستاذنا يحب يسمع إيه؟

قلت له:

- ياريت تسمعنا حاجه لسيد درويش أو زكريا أحمد.

وصرخ الشيخ إمام بفرح:

- يا حبيبي.. طب تعالى جنبى هنا بقى.

رحت جنبه هنا بقى وخذ عندك تقاسيم على العود أكدت لى إنه أستاذ متمكن بينه وبين العود علاقه عشق متبادل وبدأت أقول آه والله وأعد.. واتسعت ابتسامه سعد الموجي نورت المكان وتحول وجه الشيخ إلى وجه طفل جميل فرحان نسانى إنه كفيف وبعد ما أشبعنا نغم على العود بدأ يغنى.. إمتى الهوى يبجى سوى أغنيه أم كلثوم الشهيره وأنا كنت باقوم بدور الكورس ودى مفاجأه ساره للشيخ إمام ويمكن دا اللى خلاه أبداع وطار فى السما.. ثلاثين سنه مروا على الليله دى لكن لسه نغمها وسحرها مالى قلبى وسمعى وروحى إلى الآن.. وبعد إمتى الهوى غنى آه يا سلام زاد وجدى آه.. وياللى تشكى م الهوى هوّن عليك وفضل زى العصفور يتقل برشاقه من غصن لغصن ومن جنينه لبستان وأنا مسحور وغايب تماماً عن الوجود المحسوس لغاية ما بدأ يغنى تحفه سيد درويش الجميله أنا هويته وانتهيت.. كنت فعلاً هويته وانتهيت وبدون مقدمات سألت محمد على بعد ما نزل سعد الموجي:

- هو أنا ممكن أبات هنا؟

قال لى:

- بات ياخويا هو أنا ح اشيلك على دماغى.. بس حتنام فين؟

قلت له:

- ح انام ع الشوال ده.

ضحك وقال لى:

- إنت يا ابنى مش بتقول إنك شاعر فى الإذاعة؟

قلت له:

- أنا قتيل هنا وعشان ماترغيش كتير ده مفتاح بيتى الللى فى بولاق الدكرور أهه.

ورحت مطوح المفتاح م الشباك قال لى:

- الله يخرب بيتك.. وحاجتك الللى فى المطرح هناك؟

قلت له:

- ياخدوها سداد حق.

قال لى:

- دانة ثورجى ودماغك أوسخ من دماغ محمود اللبان.

الليلة دى أنا مش فاكِر تاريخها كل الللى فاكِره إنها كانت ليلة صيفيه من سنة

١٩٦٢ وكانت ليلة ولا كل الليالى.. ليلة ما تنحسبش م العمر رغم إنها كانت أهم

وأخطر ليالى العمر على الأقل بالنسبة لى وبالنسبة للشيخ إمام وبالنسبة للمارشال

المتعجرف الأليط الأسطى محمد الصايغ الشهير بمحمد على.

